

# FACTVM,

Pour les Superieure, Religieuses & Conuent du Monastere de S. Elizabeth, de la Prouince de S. Yves, du tiers ordre de S. François, fondées à Paris deuant le Temple, receuës partiés interuenantes au procez, d'entre les Superieurs & Religieux de la mesme Prouince de S. Yves, & du Conuent de Nazareth à Paris, près le Temple, proche ledit Monastere, deffenderesses, & demanderesses en Requête du 30. May 1650.

*Contre les Prouincial, Diffiniteurs, & Religieux dudit Ordre de la Prouince de S. François: Et les Gardien, Religieux, & Conuent des mesmes Ordre & Prouince, establis à Picpuce lez Paris, demandeurs en Requestes dès 6. & 10. May 1650. & deffendeurs: Et encores demandeurs en Requête Ciuile du 30. Avril, signifiée le 9. Iuin audit an seulement.*



N l'année 1615. ledit Monastere de S. Elizabeth fust estably de l'autorité tant du Roy & de la Reine, qui s'en rendirent fondateurs & protecteurs, que de celle de Monsieur l'Archeuesque de Paris, & du Parlement, sous la visite, conduite & obeyssance des Superieurs dudit Ordre, selon les Regles & Statuts d'iceluy, en la maison & lieux où est à present ledit Conuent de Nazareth, qui fut acquise des deniers desdites Religieuses, en attendant qu'elles eussent le moyen d'establiir & bastir à demeure ledit Monastere en l'autre costé de la rue, sur les places & lieux qu'elles ont acquises, & où il a esté estably depuis de tous poincts en l'estat qu'il est presentement.

En l'année 1628. par contract & concordat passé pardeuant Notaires entre le Pere Oronce de Honnefleu, lors Diffiniteur Prouincial & Confesseur dudit Monastere, en vertu du pouuoir à luy donné à cet effet par le Pere Ephrem d'Andely Visiteur General dudit Ordre, d'une part. Et les Superieure, Religieuses & Conuent dudit Monastere, d'autre part; de l'aduis & conseil des Peres spirituels, Syndics & Aduocats des vns & des autres: Ledites Superieure, Religieuses & Conuent quitterent & delaisserent aux Superieurs & Religieux dudit Ordre la susdite maison, places & lieux où est à present ledit Conuent de Nazareth, pour estre employez & affectez au logement & demeure des Superieurs, Confesseurs, Chapelains & autres Religieux destinez pour la conduite, direction & seruice desdites Religieuses & Monastere, & pour autrement en jouyr & disposer par lesdits Superieurs & Religieux comme de chose à eux & audit Ordre appartenante.

Moyennant & aux charges qui ensuiuent. C'est à sçauoir, de fournir, nourrir, vestir, entretenir & loger en ladite maison par lesdits Superieurs & Religieux à leurs propres frais & despens: Ledites Confesseurs & Chapelains dudit Mona-

2

stere, pour y celebrer la Messe, administrer les Sacremens, & rendre les autres assistance Spirituelles nécessaires ausdites Religieuses, & de leur bailler & fournir à perpetuité trois Freres seruaus pour seruir les Messes, & faire tous les autres Ministeres necessaires au dehors dudit Monastere; & encores sous les autres charges & obligations portées par ledit contract & concordat, qui fut homologué & confirmé selon la forme & teneur au Chapitre General dudit Ordre en la mesme année 1628.

Vers le commencement de l'année 1639. aucuns Religieux particuliers de diuerses Nations, excepté de Normandie, de la Prouince lors dite de France dudit Ordre de laquelle estoit ledit Monastere, à l'insceu des Superieurs & Diffinitours dudit Ordre & Prouince se liguerent ensemble, pour demander & procurer la diuision de ladite Prouince en deux: Et la poursuiurent contre lesdits Superieurs & Diffinitours avec tant d'ardeur, qu'enfin apres trois mois d'instance & de poursuites qu'ils en firent au Conseil: Pour obuier aux malheurs & scandales dont ils menassoient si on n'ordonnoit & faisoit ladite diuision de Prouince, ledit Conseil fut obligé de l'ordonner; & lesdits Superieurs, Diffinitours & Religieux originaires de Normandie, & lesdites Religieuses & Monastere de S. Elizabeth qui s'estoient iointes & opposées avec eux à cette diuision, & auoient déclaré que si elle se faisoit, elles n'entendoient point estre de la Prouince desdits Religieux qui la demandoient & poursuiuoient de la sorte, ains de celle de leursdits Superieurs & autres Religieux originaires de Normandie, furent enfin contraints de souffrir cette diuision de Prouince en la maniere qu'elle fut lors ordonnée par les Arrests dudit Conseil des premier Octobre & 18. Novembre 1639. & qu'elle a esté depuis actuellement faite au Chapitre General dudit Ordre, tenu au mois de Iuin ensuiuant 1640. de l'autorité du Pape & du Roy, & de l'accord & consentement de tous les Superieurs Majeurs & Diffinitours dudit Ordre; & qu'elle a encores depuis esté approuuée & confirmée par Brefs & Bulles de sa Sainteté, Arrests dudit Conseil & Patentes du Roy deuëment verifiez & registrez au Parlement par Arrests des dernier May, 22. Iuin & 19. Iuliet 1641.

Par tous lesquels Actes concernans ladite diuision de Prouince, & mesme par l'acte d'option faite par toutes les Religieuses dudit Monastere de S. Elizabeth. Ledit Conuent de Nazareth à Paris avec celuy de Moüy en Beauuoisin, proche de Normandie, & ledit Monastere de S. Elizabeth, sont & doiuent estre comme ils ont tousiours esté depuis iusques à maintenant de ladite Prouince de S. Yves, & non de celle de S. François.

Au préjudice de quoy les Religieux de ladite Prouince de S. François & du Conuent de Picpuce auteurs de ladite diuision, apres vne execution & possession entiere de plus de dix ans; au mois de May 1650. presenterent plusieurs requestes au Parlement, & firent assigner les Superieurs & Religieux de ladite Prouince de S. Yves & dudit Conuent de Nazareth, aux fins de faire distraire lesdits Conuents de Nazareth & Moüy de ladite Prouince de S. Yves, pour l'vnir à la susdite de S. François. Sur lesquelles Requestes & assignations desdits Superieurs & Religieux de S. Yves ayant présenté leur Requeste au Parlement: La Cour par son Ordonnance du 28. May auditan estant au bas de leur dite Requeste, receut lesdits Superieurs & Religieux de S. Yves & Nazareth opposans à l'execution de l'Ordonnance de parlement sommairement, & ordonna que les parties viendroient au premier iour.

3  
Ce qu'estant venu à la connoissance desdites Religieuses & Monastere de S. Elizabeth : Le 30. dudit mois de May elles furent conseillées de presenter leur Requête à la Cour, qui les a receu parties interuenantes en cette instance, & donné Acte de ce qu'elles se ioignent en cause avec lesdits Superieurs & Religieux de ladite Prouince de S. Yues & dudit Conuent de Nazareth, aux fins & conclusions de leur dite Requête, pour les raisons, causes & moyens que lesdites Religieuses déduiroient en temps & lieu.

Or les causes & moyens desdites Religieuses se peuuent aisément colliger, de ce que dessus, & sont,

1. Que par tous les actes & titres de la susdite diuision de Prouince, & par l'acte d'opuon & election desdites Religieuses, non seulement lesdits Conuents de Nazareth & Mouÿ, mais encores ledit Monastere de S. Elizabeth, sont & doiuent estre à perpetuité de ladite Prouince de S. Yues : & que si selon les pretentions desdits Superieurs & Religieux de ladite Prouince de S. François, lesdits Conuents de Nazareth & Mouÿ estoient distraits de ladite Prouince de S. Yues, & vnis à celle de S. François, il s'ensuiuroit que ledit Monastere le deuroit estre aussi : tous leurs pretendus moyens & raisons concluant aussi bien pour ledit Monastere, que pour lesdits Conuents de Nazareth & Mouÿ. Ce qu'estant ainsi, il faudroit necessairement que lesdites Religieuses & Monastere tombassent absolument sous la conduite de la ladite Prouince de S. François & des Superieurs & Religieux d'icelle, ou bien qu'elles sortissent tout à fait du gouvernement & conduite de leur dite Ordre. A quoy elles ne se pourroient iamais refoudre, & ne seroit pas iuste de les contraindre & forcer.

Non au premier, Premierement, à raison que lesdits Superieurs & Religieux de la Prouince de S. François sont les auteurs de ladite diuision de Prouince, & de tous les troubles & scandales qu'ils ont causez & causent encores incessamment dans cet Ordre sur le sujet de cette diuision. Secondement, D'autant que lesdites Religieuses s'estant toujours opposées & s'opposant encores pretentement aux desseins desdits Superieurs & Religieux de la Prouince de S. François, & ayans opté d'estre & demeurer de la Prouince de S. Yues, & sous le gouvernement des Superieurs & Religieux d'icelle : Et ayant d'ailleurs receu plusieurs mauvais offices & traitemens de ceux de la Prouince de S. François, elles auroient tres-iuste sujet de craindre d'en estre mal traitées si elles estoient obligées de les auoir pour Superieurs, & ne pourroient iamais auoir la liberté de conscience ny la confiance necessaire enuers eux, ains elles seroient dans des peines & gehenne de conscience continuelles. Non aussi au second, qui seroit de sortir entièrement du gouvernement de leur Ordre, attendu qu'elles y sont tres'affectionnées, qu'elles ont esté fondées, establies, receuës & esleuées selon leurs regles & constitutions, sous la conduite, iurisdiction & visite des Superieurs de leur dit Ordre, & qu'elles en ont receu & recoiuent encores iournellement toute sorte d'edification & satisfaction.

2. Inçoit que les Peres de la Prouince de S. François consentissent & accordassent qu'après cette pretendue distraction & vñion desdits Conuents de Nazareth & Mouÿ à leur Prouince, lesdites Religieuses & Monastere de S. Elizabeth fussent & demeurassent de ladite Prouince de S. Yues, & sous le gouvernement & conduite des propres Superieurs d'icelle, elles ne laisseroient pas de souf-

fuir de tres grands & notables dommages & interests de cette pretenduë distraction & vnion desdits deux Conuents, ainsi qu'il se verra clairement cy-apres, & particulièrement en ce qu'elles seroient tout d'un coup entierement spoliées & priuées de deux choses qui leur sont de tres grande importance.

La premiere est, d'une maison qui leur appartenoit legitiment, & qu'elles n'ont cedée & quittée à leurs Peres, qu'à la charge & condition expresse qu'elle demeureroit affectée & destinée au logement & demeure de leurs Superieurs, Confesseurs, Chapelains & autres Religieux qui leur sont necessaires, & lesquels leursdits Peres seroient tenus & obligez de leur fournir, nourrir, entretenir & loger près d'elles à leurs propres despens en ladite maison, pour le gouvernement & ministere dudit Monastere, dont elles demeureroient chargées.

La seconde chose dont elles se trouueroient priuées est, de la proximité & presence desdits Superieurs & Religieux de leur Prouince, & des grands secours & seruices qu'elles en reçoient & doiuent recevoir, tandis que ceux d'une autre Prouince qu'elles ne pourroient ny deueroient communiquer seroient logez proche d'elles dans leur dite maison, & iouïroient des fruits & trauaux des Superieurs & Religieux de leur propre Prouince de S. Yves, auxquels elles ont cédé & quitté ladite maison place & lieux, ou est à present ledit Conuent de Nazareth, & lesquels ont depuis ladite diuision rebasty de neuf, meublé & orné de tous points ledit Conuent, des bienfaits & charitez de Monsieur le Chancelier Secquier leur fondateur.

3. Il est tout manifeste que si ladite Prouince de S. Yves n'auoit plus de maison à Paris, elle ne pourroit plus s'estendre ny accroistre en maisons, ny en personnes, ny pas mesme subsister; ainsi elle descherroit visiblement, & se verroit dans peu reduite en un tres pitoyable estat: D'où il s'ensuiuroit qu'outre les notables dommages que les Religieux d'icelle en souffriroient, le dits Religieuses & Monastere n'en pourroient plus recevoir le gouuernement & direction, ny les secours & assistances qui leur sont necessaires, & qu'elles en ont reçu & doiuent recevoir; leur dite Prouince ayant maison près d'elles à Paris, & pouuant aisément par le moyen de cette maison, & des connoissances, habitudes & amis qu'elle donne aux Superieurs & Religieux de ladite Prouince, se maintenir, fortifier, & augmenter en toutes façons, ainsi qu'elle a fait depuis ladite diuision & erection d'icelle.

De dire, comme font lesdits Superieurs & Religieux de ladite Prouince de S. François, & Conuent de Picpuce, qu'ils logeroient, entretiendroient, & nourriroient avec eux, où dans l'Hospice des Freres dudit Monastere, les Peres Confesseurs, & Chapelains d'iceluy de la Prouince de S. Yves: Il n'y a (sans correction) propos n'y apparence quelconque, que les Confesseurs & Chapelains dudit Monastere fussent de ladite Prouince de S. Yves, & fussent neantmoins logez, nourris, & entretenus dans une maison & aux despens des Superieurs & Religieux de la Prouince de S. François. Et cela n'empescheroit pas que cette pretenduë distraction & vnion dudit Conuent de Nazareth à ladite Prouince de S. François ne fust extrêmement préjudiciable auxdites Religieuses, tant pour les raisons iudiciaires, qui ne laisseroient pas de subsister, que pour les suivantes. C'est à sçauoir, Qu'un Confesseur & un Chapelain ordinaire ne pourroient pas suffire à une telle Communauté que la leur, qui est de quatre vingts Religieuses, sans

5  
parler des Pensionnaires. Qu'outre les Confesseurs ordinaires, selon le S. Concile de Trente, & les Statuts desdites Religieuses, leurs Superieurs leur doiuent encore donner des Confesseurs extraordinaires quatre où cinq fois l'année. Et outre lesdits Confesseurs ordinaires & extraordinaires que les Superieurs doiuent donner à toute la Communauté, lesdites Religieuses viuant comme elles font dans vne estroite closture, & n'ayant d'autre conduite, instruction & consolation, que celle qu'elles reçoient & peuuent receuoir des Superieurs & Peres de leur dit Ordre & Prouince : Elles peuuent auoir souuent besoin de quelques autres Peres, soit pour les Confesser en quelques cas particuliers, soit pour se consoler dans quelques peines & difficultez, soit pour conferer de leur interior, & tirer quelques lumieres & conseils saluaires pour leur conduite & aduancement en la vertu & perfection Religieuse. D'ailleurs si elles n'auoient que leur Confesseur & Chapelain logez près d'elles, elles seroient souuent obligées d'aller mandier des Predicateurs ailleurs, non seulement pour tous les Aduents & Caremes, mais encores pour tous les autres iours de l'année, que l'on presche & doit prescher en leur Eglise, ce qui ne seroit pas vne petite despenſe & charge. De plus leur Monastere estant chargé de plusieurs Messes de fondation perpetuelle, & souuent d'Annuels, & autres Messes que leurs parens font dire en l'Eglise d'iceluy, & ayant besoin de Prestres, Diacres, Sous-diacres, Acolites, & autres Religieux pour celebrer lesdites Messes, & officier aux bons iours de l'année, & aux Vestures & Professions : comme aussi aux Enterremens & Seruices, tant des Religieuses, que de leurs parens : ce sont les Superieurs, & les Peres & Religieux de ladite Prouince de S. Yves, & Conuent de Nazareth, qui pouruoient & fournissent à tout cela, & qui font encores la charité aux parens desdites Religieuses, de les aller assister & consoler dans leurs maladies & afflictions, lors qu'elles les en prient. Finalement ledit Monastere ayant souuent besoin des conseils, sollicitations, & assistances des Superieurs, & autres Peres de leur ditte Prouince, dans les affaires temporelles d'iceluy : lesdites Religieuses sont obligées de recourir à eux pour cela. Bref, c'est de leursdits Peres & Superieurs, qu'apres Dieu, elles reçoient & peuuent receuoir le plus de consolation & assistance en tous leurs besoins. Et ça esté dans les vœux & esperances de tous ces secours & assistances, qu'elles ont cedé & quitté les places & anciens bastimens dudit Conuent de Nazareth, à leursdits Peres Superieurs, aufquels autrement elles ne les auroient pas quitez.

De toutes lesquelles choses elles seroient entierement frustrées & priuées si leursdits Superieurs, & autres Peres & Religieux de leur Prouince, n'estoient maintenus, comme ils sont, en leur dit Conuent de Nazareth, & si elles estoient reduites à n'auoir qu'un Confesseur & Chapelain, où peu de Peres de leur Prouince proche d'elles : Et il ny auroit pas d'apparence que dans toutes lesdites occurrences & necessitez, lesdites Religieuses peussent ny deussent se resoudre de recourir aux Religieux d'une autre Prouince, si peu affectionnez en leur endroict, & enuers les Superieurs & Religieux de leur propre Prouince.

De rendre ledit Conuent de Nazareth commun à toutes lesdites deux Prouinces de S. Yves & de S. François, ainsi que pretendroient lesdits Superieurs & Religieux de la Prouince de S. François & du Conuent de Picpuce, il n'en pourroit arriuer que de plus grans troubles & scandales que iamais, & il seroit à crain-

6  
dre que lesdits Religieux de la Prouince de S. François, n'en fissent tant qu'enfin ils en chassassent encores ceux de la Prouince de S. Yues, comme il ont fait du Conuent de Picpuce : Car s'il ne les ont peu souffrir ny viure en paix & charité avec eux, dans toute vne Prouince entiere, & en vn grand Conuent tel que celuy de Picpuce, comment le feroient ils dans ce petit Conuent de Nazareth : Et lesdites Religieuses de S. Elizabeth en souffriroient d'ailleurs plusieurs tres-notables & inéuitables dommages & interets, & nommément deux.

Le premier est, que par l'introduction & establissement de cette pretendue communauté dudit Conuent de Nazareth ausdites deux Prouinces de S. Yues & de S. François, il n'y auroit plus à l'aduenir audit Conuent que la moitié de ce qu'il y a presentement & doit y auoir de Religieux de ladite Prouince de S. Yues, & ce encores des moins considerables d'icelle ; au moyen dequoy il seroit impossible que lesdites Religieuses & Monastere en receussent les assistances spirituelles & temporelles qu'elles en ont receu & doiuent receuoir, toute la famille entiere dudit Conuent estant de Religieux de leur propre Prouince, & ce encores pour la plupart des principaux & plus considerables d'icelle, lesquels aussi bien que leur Prouincial mesme en seroient exclus, & n'y pourroient ny voudroient demeurer si ce Conuent n'estoit propre à leur Prouince, ains commun à toutes les deux.

Le second & principal de tous est, que de cette pretendue Communauté composée des Religieux desdites deux Prouinces, resulteroit infailliblement en bref la ruine & desolation entiere desdites Religieuses & Monastere, par le trouble, & la dissention, & diuision que la proximité & communication qu'on ne pourroit empescher des Religieux de la Prouince de S. François, ne manqueroient iamais de ietter & fomentier dans la Communauté dudit Monastere, pour en exclure tout à fait ceux de la Prouince de S. Yues, ou faire entierement perdre ledit Monastere audit Ordre, ainsi que lesdits Religieux de la Prouince de S. François ont souuent proposé & tanté. Pour à quoy remedier lesdites Religieuses ont esté contraintes de recourir à leurs Majestez, Fondateurs & Protecteurs dudit Monastere, pour demander leur protection, & leur estre pourueu, ainsi qu'il a esté par les Atrests qu'elles ont obtenu à cet effet.

Pour toutes lesquelles causes & moyens, & autres que la Religion, equité, & bonne iustice de la Cour, pourra (s'il luy plaist) selon sa bonté ordinaire trop mieux suppléer, lesdits Superieurs & Religieux desdites Prouince de S. François & Picpuce seront declarez non receuables, & deboutez de toutes leursdites Requestes. Et lesdits Superieurs & Religieux desdites Prouince de S. Yues & Conuent de Nazareth, maintenus en la possession & iouissance desdits Conuents de Nazareth & Moüy. Et lesdites Superieure, Religieuses & Monastere de S. Elizabeth en la protection du Roy & de la Cour, sous la visite, conduite & obeyssance des Superieurs dudit Ordre de leur Prouince de S. Yues, & en la possession & iouissance des susdites charges & obligations, sous lesquelles elles ont cédé & quitté les susdites places & anciens bastimés dudit Conuent de Nazareth à leursdits Peres & Superieurs, avec deffences ausdits Superieurs & Religieux desdites Prouince de S. François & Picpuce, & à tous autres de les y troubler.

*Chardon*  
M. ~~BE~~ Adnocat.

*Pecadeau.*

*Garanger.*



